

太子須大拏經

出六度集經第二卷

才四

乞伏秦三藏法師釋聖堅譯

聞如是一時佛在舍衛祇洹阿難邠坻阿藍
時與無央數比丘比丘尼優婆塞優婆夷俱
在四部弟子中央坐時佛微笑口中五色光
出阿難從座起整衣服叉手長跪白佛言我
侍佛以來二十餘年未嘗見佛妄笑如今日
也今佛爲念過去當來今現在佛乎獨當有
意願欲聞之佛語阿難我亦不念去來今佛
也我自念過去無央數阿僧祇劫行檀波羅

蜜事耳阿難問佛言何等爲行檀波羅蜜事
佛言往昔過去不可計劫時有大國名爲葉
波其王號曰濕波以正法治國不枉人民王
有四千大臣主六十小國八百聚落有大白
象五百頭王有二萬夫人了無有子王自禱
祠諸神及山川夫人便覺有娠王自供養夫
人牀卧飲食皆令細軟至滿十月太子便生
宮中二萬夫人聞太子生悉皆歡喜踊躍乳
湏自然出以是之故便字太子爲須大拏有
四乳母養護太子中有乳太子者中有抱太

子者中有洗浴太子者中有將太子行遊戲者太子至年十六書計射御及諸禮樂皆悉備工太子承事父母如事天神王爲太子別立宮室太子少小以來常好布施天下人民及飛鳥走獸願令衆生常得其福愚人慳貪不肯布施愚惑自欺無益於已智者居世則知布施爲德布施之士皆爲過去當來今現在佛辟支佛羅漢所共稱譽太子年遂長大王爲太子納妃妃名漫抵國王女也端正無雙以妙瑠璃金銀雜寶瓔珞其身太子有一

男一女太子自思惟欲行檀波羅蜜事太子報王欲出遊觀王即聽之太子便出城天王釋下化作貧窮聾盲瘡癰之人悉在道邊太子見之即迴車還宮大愁憂不樂王問太子出遊來還何故不樂太子白王言我適出遊見諸貧窮聾盲瘡癰人是故愁憂耳我欲從王乞求一願不審大王當見聽不王答太子欲願何等在汝所索耳不違汝意太子言我願欲得大王中藏所有珍寶置四城門外及著市中以用布施在所求索不逆人意王語

太子恣汝所欲不違汝也太子即使傍臣輦取珍寶著四城門外及著市中以用布施恣人所索八方上下莫不聞知太子功德者四遠人民有從百里來者千里來者萬里外來者人欲得食者與食欲得衣者與衣欲得金銀珍寶者恣意與之在所欲得不逆其意時有敵國怨家聞太子好喜布施在所求索不逆人意即會諸臣及衆道士共集議言葉波國王有行蓮華上白象名須檀延者多力健鬪每與諸國共相攻伐此象常勝誰能往乞

者諸臣咸言無能往得者中有道士八人即白王言我能往乞之當給我資糧王即給之王便語言能得象者我重賞汝道士八人即行持杖遠涉山川詣葉波國至太子宫門下俱拄杖翹一脚向門而立時守門者入白太子外有道士悉皆拄杖俱翹一脚住自說言故從遠來欲有所乞太子聞之甚大歡喜便出迎之前爲作禮如子見父因相勞問何所從來行道得無勤苦欲何所求索用翹一脚爲乎道士八人言我聞太子好喜布施在所

求索不逆人意太子名字流聞八方上徹蒼天下至黃泉布施之功德不可量遠近歌誦莫不聞知人說太子實不妄也今爲天人之子天人所言終不欺也如今太子審布施不逆人意者欲從太子乞丐行蓮華上白象太子即時至象廐中令取一象去道士八人言我正欲得行蓮華上白象名須檀延者太子言此大白象是我父王之所愛重王視白象如視我無異不可以與卿若與卿者我即失父王意或能坐此象逐我今出國太子即自

思惟念言我前有要願在所布施不逆人意今不與者違我本心若不以此布施者從何當得成無上平等度意聽當與之以成無上平等之度太子言諾大善願以相與即勅左右象被金銀鞍勒疾牽來出太子左右持水澡婆羅門手右手牽象以授與之八人得象即咒願太子咒願畢已累騎白象歡喜而去太子語婆羅門言疾去王若知者便逐奪卿時婆羅門即便疾去國中諸臣聞太子以健白象布施怨家皆大驚怖從床而墮愁憂不

樂念言國家但怙此象以却敵國耳諸臣皆往白王太子以國中却敵之寶象布施怨家大王聞愕然臣復白王今王所以得天下者有此象故也此象勝於六十象力而太子用乞怨家將恐失國當奈之何太子如是自恣布施中藏日空三四歲中臣恐舉國及妻子皆以與人王聞臣語益大不樂因呼一大臣而問之曰太子審持白象與怨家不大臣答言實以與之王聞臣言乃更大驚從床而墮悶不知人以水灑之良久乃甦二萬夫人亦

皆不樂王與諸臣共議言當奈太子何中有一臣言以脚入象殿中者當截其脚手牽象者當截其手眼視象者當挑其眼或言當斷其頭諸臣共議各言如是王聞是語甚大愁憂語諸臣言兒大好道喜布施人奈何禁止拘閉之也中有一大臣嫌諸臣議不當爾也王唯有是一子耳甚愛重之此王之太子云何欲刑殘乃生是心耶大臣白王言臣亦不敢使大王禁止拘閉太子也但逐令出國安置野田山中十二年許當使漸愧王即隨此

大臣所言即遣使者召問太子汝持白象與怨家不太子白王實以與之王問太子汝何故持我白象以與怨家而不白我太子白言前已與王自有要令諸所布施不逆人意是以不白王耳王言前所要者自謂珍寶白象何預太子報言此皆是王之所有物何得獨不在中耶王語太子速出國去徙汝著檀特山中十二年太子白王言不敢違戾大王教令願復布施七日展我微心乃出國去王言汝正坐布施太劇空我國藏失我却敵之寶

故逐汝耳不得復住布施七日速疾出去不聽汝也太子白言不敢違戾大王教令今我自有私財願得布施盡之乃去不敢復煩國家財寶二萬夫人共詣王所請留太子布施七日乃令出國王即聽之太子便使左右普告四遠其有欲得財物者悉詣宮門隨所欲得人有財物不可常保會當壞散四方人民皆來詣門太子爲設飯食施與珍寶恣意而去七日財盡貧者得富萬民歡喜太子語其妻疾起聽我言大王今逐我著檀特山中十

二年妃聞太子言愕然驚起曰太子有何過而王乃當至是乎太子報言用我布施太劇空虛國藏以健白象施與怨家王及傍臣用是之故恚共逐我耳漫坻言使國豐溢願令大王及諸傍臣吏民大小富樂無極但當努力共於山中求索道耳太子言人在山中恐怖之處致難爲心虎狼猛獸大可畏也汝快憍樂何能忍是汝在宮中衣即細軟止即幃帳飲食甘美恣口所欲今在山中卧即草蓆食則果蓏汝奈何樂是又多風雨雷電霧露

使人毛豎寒則大寒熱則大熱樹木之間不可依止加地有蒺藜礫石毒蟲汝何能忍是漫坻言我當用是細軟幃帳甘美飲食者爲何而與太子別乎我終不能相遠離也會當與太子相隨去耳王者以旛爲幟火者以烟爲幟婦人者以夫爲幟我但依怙太子耳太子者我之所天太子在國時布施四遠我常與太子共之今太子遠去若有來乞丐者我當應之云何我聞人來索太子我當感死何疑太子言我好布施不逆人意有人從我乞

兒索汝者我則不能不與之汝若不順我言
即亂我善心可不須去漫坻言聽隨太子在
所布施莫得休懈世間布施未有如太子者
也太子言汝能爾者大善太子與妃及其二
子共至母所辭別欲去白其母言願數諫大
王以正法治國莫邪枉人民母聞太子辭別
如是感激悲哀語傍人言我身如石心如剛
鐵奉事大王未嘗有過今唯有一子而捨我
去我心何能不破裂如死耶兒在腹中如樹
木葉日夜長大養子適大而捨我去諸夫人

皆當快我王不復敬我天不違我願使我子
速還國耳太子與妃及其二子俱爲父母作
禮於是而去二萬夫人以眞珠各一貫以與
太子四千大臣作七寶珠華奉上太子太子
從中宮北出城門悉以七寶珠華布施四遠
來人即時皆盡國中吏民大小數千萬人共
送太子者皆竊議言太子善人是國之神父
母何能逐是珍寶之子乎觀者皆共惜之太
子於城外樹下坐辭謝來送者可從此而還
吏民大小垂淚而歸太子與妃二子共載自

御而去前行已遠止息樹下諸婆羅門來乞馬太子即卸車以馬與之以二子著車上妃於後推自於轅中步挽而去適復前行復逢婆羅門來乞車太子即以車與之適復前行復有婆羅門來乞太子言我不與卿有所愛惜我財物皆盡婆羅門言無財物者與我身上衣太子即解寶衣與之更著一故衣適復前行復逢婆羅門來乞太子以妃衣服與之轉復前行復逢婆羅門來乞太子以兩兒衣服與之太子布施車馬錢財衣服了盡無所

復有初無悔心大如毛髮太子自負其男妃負其女步行而去太子與妃及其二子和顏歡喜相隨入山檀特山去葉波國六千餘里去國遂遠行在空澤中大苦飢渴忉利天王釋即於曠澤中化作城郭市里街巷妓樂衣被飲食城中有人出迎太子便可於此留止飲食以相娛樂妃語太子行道甚極可暇止此不太子言父王徙我著檀特山中於此留者違父王命非孝子也遂便出城顧視不復見城轉復前行到檀特山山下有大水深不

可渡妃語太子且當住此須水減乃渡太子
言父王徙我著檀特山中於此住者違父王
教非孝子也太子即入慈心三昧水中便有
大山以堰斷水太子即與妃褰裳而渡渡已
太子即心念言便爾去者水當澆灌殺諸人
民及蜻飛蠕動太子即還顧謂水言復流如
故若有欲來至我所者皆當令得渡太子語
適已水即復流如故前到檀特山中太子見
山嶽崙嵯峨樹木繁茂百鳥悲鳴流泉清池
美水甘果鳧鴈鵲翡翠鴛鴦異類甚衆太

子語妃觀是山中樹木參天無折傷者飲此
美泉散是甘果而是山中亦有學道者太子
入山山中禽獸皆大歡喜來迎太子山上有
一道人名阿州陀年五百歲有絕妙之德太
子作禮却住白言今在山中何許有好甘果
泉水可止處耶阿州陀言是山中者普是福
地所在可止耳道人即言今此山中清淨之
處卿云何將妻子來而欲學道乎太子未答
漫抵即問道人言在此學道爲幾何歲道人
答言止此山中四五百歲漫抵謂言計有吾

我人者何時當得道耶雖久在山中亦如樹木無異不計吾我人者乃可得道道人言我實不及如此事也太子即問道人言頗聞葉波國王太子須大拏不道人言我數聞之但未曾見耳太子言我正是須大拏也道人問太子言所求何等太子答言欲求摩訶衍道才四九人言太子功德乃爾今得摩訶衍不久也太子得無上正真道時我當作第一神足弟子道人即指語太子所止處太子則法道人結頭編髮以泉水果蓂爲飲食即取柴薪作小

草屋并爲漫埵及二小兒各作一草屋凡作三草屋男名耶利年七歲著草衣隨父出入女名罽拏延年六歲著鹿皮衣隨母出入山中禽獸悉皆歡喜來依附太子太子適一宿山中空池皆生泉水枯木諸樹皆生華葉諸毒蟲獸皆爲消滅相食噉者皆自食草諸雜果樹自然茂盛百鳥嚶嚶相和悲鳴漫埵出行採果以飼太子及其男女二兒亦復捨父母行在於水邊與禽獸共戲或有宿時時男耶利騎師子上戲師子跳踉便墮耶利小傷

其面而便血出獼猴便取樹葉拭其面血將至水邊以水而洗太子亦遙見之

時鳩留國有一貧窮婆羅門年至四十乃取婦婦大端正婆羅門有十二醜身體黑如漆面上三醜鼻正匾蹙兩目復青面皺唇哆語言蹇吃大腹凸髑脚復繚戾頭復頽秃狀類似鬼其婦惡見呪欲令死婦行汲水道逢諸年少嗤說其壻形調笑之問言汝絕端正何能爲是人作婦耶婦語年少言是老公頭白如霜著樹朝暮欲令其死但無奈其不肯死

何婦持水啼而且歸語其壻言我適取水年少曹輩共形調我當爲我索奴婢我有奴婢者便不復自行汲水人亦不復笑我壻言我極貧窮當於何所得奴婢耶婦言不爲我索奴婢者我便當去不復共居婦言我聞太子須大拏坐布施^{十四}太劇故父王徙著檀特山^十中有一男一女可往乞之壻言檀特山去此六千餘里初不山行當於何所而行求之手婦言不爲我求奴婢者我當自經死耳壻言寧殺我身不欲令汝死也壻言汝欲令我行者

當給我資糧婦言便去無有資糧婆羅門自辦資糧涉道而去於是婆羅門逕詣葉波國至王宮門外問守門者曰太子須大拏今爲所在守門者即入白王言外有婆羅門來問索太子王聞人來索太子心惑且恚自念言但坐是輩故逐太子今此人復來耶王便自說喻言如火自熾復益其薪今我愁憂譬如火熾人來問太子如益其薪婆羅門言我從遠來聞太子名上徹蒼天下至黃泉太子布施不逆人意故從遠來欲有所得王言太子

獨處深山甚大貧窮當何以與汝耶婆羅門言太子雖無所有貴欲相見耳王即使人指示道徑婆羅門即行詣檀特山至大水邊但念太子即便得渡時婆羅門遂入山中逢一獵師問言汝在山中頗見太子須大拏不獵者素知太子坐布施諸婆羅門故徒在山中獵者便取婆羅門縛著樹以捶鞭之身體悉破罵言我欲射汝腹用問太子爲婆羅門自念今當爲子所殺耶當作一詭語耳便言汝不當問我耶獵者問曰汝欲何說婆羅門言

父王思見太子故遣我來追呼太子令還國耳獵者便解放逆辭謝之實不相知指示其處婆羅門即到太子所太子遙見婆羅門來甚大歡喜迎爲作禮因相勞問何所從來行道得無疲極何所索乎婆羅門言我從遠方來舉身皆痛又大飢渴太子即請婆羅門入坐出果蓏水漿著其前婆羅門飲水食果竟便語太子言我是鳩留國人也久聞太子好喜布施名聞十方我大貧窮欲從太子有所乞丐太子言我不與卿有所愛也我所有盡

賜無以相與婆羅門言若無者與我兩兒以爲給使可養老者如是至三太子言卿故遠來欲得我男女奈何而不相與時兩兒行戲太子呼語兒言此婆羅門遠來乞汝我以許之汝便隨去兩兒走入父腋下淚出且言我數見婆羅門未嘗見是輩此非婆羅門爲是鬼耳今我母行採果未還而父持我與鬼作食定死無疑今我母來索我不得當如牛索其犢子便啼哭號泣愁憂太子言我已許之何從得止是婆羅門耳非是鬼也終不罰汝

汝便隨去婆羅門言我欲發去恐其母來便
不復得去卿持善心與我母來即敗卿善意
太子報言我從生已來布施未嘗有悔也太
子即以水澡婆羅門手牽兩兒授與之地爲
震動兩兒不肯隨去還至父前長跪爲父言
十四
我宿命有何罪今復遭值此乃以國王種爲
十二
人作奴婢向父悔過從是因緣罪滅福生世
世莫復值遇是太子語兒言天下恩愛皆當
別離一切無常何可保守我得無上平等道
時自當度汝兩兒語父言爲我謝母今便永

絕恨不面別自我宿罪當遭此苦念母失我
憂苦愁勞婆羅門言我老且羸小兒各當捨
我還其母所我當奈何得之當縛付我耳太
子即反兩兒手使婆羅門自縛之繫令相連
總持繩頭兩兒不肯隨去以捶鞭之血出流
地太子見之淚出墮地地爲之沸太子與諸
禽獸皆送兩兒不見乃還諸禽獸皆隨太子
還至兩兒戲處號呼宛轉而自撲婆羅門竟
持兩兒去兒於道中以繩繞樹不肯隨去冀
其母來婆羅門以捶鞭之兩兒言莫復撻我

我自去耳仰天呼言山神樹神一哀念我今
當遠去爲人作奴婢不見母別可語我母捨
果菰疾來與我相見母於山中左足下痒右
目復睜兩乳汁出母便自思惟未嘗有是怪
當用此果爲宜歸視我兒得無有他故便棄
果走歸第二^{十四}忉利天王釋知太子^{十三}以兒與人
恐妃敗其善心便化作師子當道而蹲妃語
師子卿是獸中王我亦人中之王女共在山
中願小相避使得過去我有二子皆尚幼小
朝來無所食噉但望待我耳師子知婆羅門

去遠乃起避道令妃得過妃還見太子獨坐
不見兩兒自至其草屋中索之不見復至兒
屋中索之不見復至兒常所戲水邊亦復不
見但見兒所共戲禽獸聲鹿師子獼猴皆在
漫坻前自撲號呼所戲池水爲之空竭漫坻
便還至太子所問太子兩兒爲何所在太子
不應漫坻復言兒遙見我持果走來趣我躡
地復起跳踉呼言阿母來歸我坐時皆在左
右見我肩上有塵土即爲拂去之今亦不見
兒兒亦不來附我爲持與誰乎今不見之我

心摧裂早語我處莫令我發狂如是至三太子不應漫坻益更愁毒言不見兩兒尚復可耳今太子不應益令我迷荒太子語言鳩留國有一婆羅門來從我乞兩兒便以與之妃聞太子語便感激躋地如太山崩宛轉啼哭而不可止太子言且止汝識過去提和竭羅佛時本要不耶我爾時作婆羅門子字鞞多衛汝作婆羅門女字須羅陀汝持華七莖我持銀錢五百買汝五華欲以散佛汝以二華寄我上佛而求願言願我後生常爲卿妻我

爾時與汝要言欲爲我妻者常隨我意在所布施不逆人心唯不以父母施耳其餘施者皆隨我意汝爾時答我言可今以兒布施而反亂我善心耶妃聞太子言心意開解便識宿命聽隨太子布施疾得心所欲天王釋見太子布施如此即下試太子以欲何求化作婆羅門亦復有十二醜到太子前而自說言常聞太子好喜布施在所求索不逆人意故來到此願乞我妃太子言諾大善可得妃言今以我與人誰當供養太子者太子言今不

以汝施者何從得成無上平等度意太子以
水澡婆羅門手牽妃以授與之釋知太子了
無悔意諸天讚歎天地大動時婆羅門便將
妃去行至七步尋將妃還以寄太子莫復與
人也太子言何爲不取豈有惡乎諸人婦中
是婦爲善現國王子其父唯有是一女耳是
婦以我故自投湯火中飲食羶惡而尚不避
所爲精進面貌端正卿今取去我心乃喜婆
羅門語太子言我非婆羅門是天王釋故來
相試耳欲願何等即復釋身端正姝好妃即

作禮從索三願一者令將我兒去婆羅門還
賣著我本國中二者令我兩兒不苦飢渴三
者令我及太子早得還國天王釋言當如所
願太子言願令衆生皆得度脫無復生死老
病之苦天王釋言大哉所願巍巍無上若欲
生天作日月十四中王世間帝王住延壽命我能
相與如卿所說三界之特尊非我所及也太
子言今且願我令得大富常好布施又勝於
前令我父王及諸傍臣皆思見我天王釋言
必如所願忽然不見鳩留國婆羅門得兒還

歸家婦逆罵之何忍持此兒來還此兒國王種而無慈仁心撾捶令生瘡身體皆膿血促持行街賣更求可使者壻便隨婦言即行街賣之天王釋言行環市并言此兒貴無有能買者兒適飢渴天以自然氣令兒得飽滿天王化其意乃至葉波國國中大臣及諸人民識知是太子兒大王之孫舉國大小莫不悲哀諸臣即問所從得兒婆羅門言我自乞得用問我爲諸臣言卿來入我國我亦應問卿大臣人民便欲奪取婆羅門兒中有長者而

諫之曰斯乃太子布施之心以至於此而今奪之不當顧違太子之本意耶不如白王王聞知者自當贖之於是乃止諸臣白王言大王兩孫今爲婆羅門之所街賣王聞大驚即呼婆羅門便將兒入宮王與夫人及諸傍臣後宮嫫女遙見兩兒莫不哽咽王問婆羅門何緣得此兒婆羅門答言我從太子乞丐得耳王呼兩兒而欲抱之兒皆涕泣不肯就抱王問婆羅門賣兒索幾錢婆羅門未及得對男兒便言男直銀錢一千特牛一百頭女直

金錢二千牒牛二百頭王言男兒人之所珍
何故男賤而女貴耶兒言後宮妓女與王無
親或出微賤或但婢使王意所幸便得尊貴
被服珍寶飲食百味王獨有一子而逐之於
深山日日自與宮女相娛樂了無念子之意
是以明知男賤而女貴也王聞是語感激悲
哀號泣交迸言我大負汝汝何故不就我抱
恚我乎畏婆羅門耶兒言不敢怨大王亦不
畏婆羅門本是大王孫今爲人奴婢何有人
奴婢而就國王抱是故不敢耳王聞是語倍

增悲愴即如其言顧婆羅門更呼兩兒抱兒
便就王抱王抱兩孫摩挲其身問兩兒言汝
父在山中何所飲食被服何等兩兒答言食
果蔬菜茹被褐爲服飾百鳥相娛樂亦無愁
憂心王即遣婆羅門去男兒白王此婆羅門
大苦飢渴願賜其一食王言汝不忿恚之耶
何故復爲索食耶兒言我父好道無復財物
可用布施者以我丐之則是我大家我尚未
得爲之走使以副我父道意今何忍見其飢
渴而無慈心我父乃以兒丐人大王何惜一

食耶王即賜食婆羅門食畢歡喜還國王遣使者促迎太子還本國使者受教往迎太子礙水不得渡但念太子即便得渡往到太子所便以王命而告太子宜速還國王思見太子太子答言王從我著山中十二爲期年尚有一年^{十四}在年滿自當歸使者還白王具說太子語王更復作手書以與太子汝是智慧之人去者亦當忍來者亦當忍云何恚不還須汝飲食耳使者復贊書往太子所太子得書頭面著地作禮却遠七市已便發視之山中

諸禽獸聞太子當還跳踉宛轉自撲而號呼泉水爲空竭禽獸爲不乳百鳥皆悲鳴用失太子故太子即著衣與妃俱還敵國怨家聞太子當還即遣使者速被白象金銀鞍勒以金鉢盛銀粟銀鉢盛金粟逆於道中以還太子辭謝悔過言前乞白象愚癡故耳坐我之故遠徙太子今聞來還內懷歡喜今以白象奉還太子及上金銀之粟願垂納受以除罪咎太子答言譬如有人設百味食持有所上其人食已嘔吐在地豈復香潔可更食不令

我布施譬亦若吐終不復還受便乘象去謝
汝國王苦屈使者遠相勞問於是使者即乘
象還白王如是因此象故敵國之怨化爲慈
仁國王及衆皆發無上平等度意父王乘象
出迎太子太子便前頭面作禮從王而歸國
中人民莫不歡喜散華燒香懸繒播蓋香汁
灑地以待太子太子入宮即到母前頭面作
禮而問起居王以寶藏以付太子恣意布施
轉勝於前布施不休自致得佛佛告阿難我
宿命所行布施如是太子須大拏者我身是

也時父王者今現我父闕頭檀是也爾時母
者今現我母摩耶是也時妃者今瞿夷是時
山中道人阿州陀者摩訶目犍連是時天王
釋者舍利弗是時射獵者阿難是時男兒耶
利者今現我子羅雲是時女兒十八罽拏延者今
現羅漢末利母是乞兒婆羅門者今調達是
時婆羅門婦者梅遮那摩是勤苦如是無央
數劫作善亦無央數劫常持是經爲諸沙門
一切說之菩薩行檀波羅蜜布施如是
太子須大拏經

